



Mir schotte-n-uns ab!

Bisch Aidgenoss? Und läbsch im Mittelalter?
 Und raube, moorde, s Huus aazine gfallt dr?
 Kasch nyt? Bisch nyt? Hesch zvyyl Aggressionen?
 E Ryyslaiffer-Stell wurd denn sich loone!
 Schier wie hittigsdaags d Dschihadische
 sinn d Schyy-Sadische denn uff d Pischte,
 hänn ygmischt sich, in fremdi Händel yyne,
 wie d Russe – KRIMinell - in d Ukraine.
 Doch 1515, z Marignano,
 steen sii sich sälber bletzig vis-à-vis:
 E Schlacht, zig dausig doot . Punggt-Schluss-verbyy.
Syt denne-n-isch uns d Wält egaal:
Mir sinn neutral.

Eerscht wo dr Dunant grindet s rooti Gryz
 git's Solidari-Dääter in dr Schwyz.
 Doch s Schwyzer Gryz blybt nit lang root.
 Wel uns die wyssi Weschte stoot,
 uns s Fremde massewyys bedroot,
 isch d Solidarideet bald doot.
 Dr Bligg verspeert vo Gaarte Haag und Bäärg
 mutiert e jeede schnäll zem Gaartezwäärg.
 Mit Kue-Glogge-n-und Geranium
 bekämpfe mir s Germanium.

Zem **NYT** me **GSEE** steggt s ganzi Land
 Im Kollektiv dr Kopf in Sand.
 Dr Burk(a)halter vo dr OSZE
 het nie e Russ in dr Ukraine gsee.
 Wenn Fluugi deert vom Himmel kyppe
 häisst das politisch Voogelgrippe,

D Juuged, mit Kopfheerer scho geboore,
 het **NYT GHEERT** als Muusig mit den Oore.
 Nyt gheert vo Schlepper, Kopfgäld, Lampedusa,
 wo dääglig Wasserlyche kemme-n-usa.
 Nur dr Muurer murr es wurd gar nit stimme,
 as Eritreer Mie hänn mit em Schwimme.

NYT SAAGE gheert bi uns zem guete Doon,
 Bangg- und andri Ghaimnis hänn Tradition.
 Wäär iiberaal will brofydiere,
 kaa s Grytisiere nit riskiere.

Drum liebe CHARLIE, reste chez toi,
yych HEBDO d Schnuure, je suis(se) moi!

p.s. Dass Schwyyge groossi Noodail het,
 bewyyst mit em Somm uns d NZZ!



Und wäärend mir sälbscht-verliebte-n-Affe
 d Conchita mit oder ooni Wuurscht begaffe
 singt oobe-rächts z Nigeria
 mit bluetverschmierte Händ d Miseria:

Je suis Awa, wo Boko Haram het ins Haarem gsteegt

Je suis Rebecca, wo sich vergääbe het versteegt

Je suis Rahap, wo si uus dr Schuel hänn graubt

Je suis Hauwa, wel iiri Gschicht e kaine glaubt

Je suis Mary, wo so bletzig isch verschwunde

Je suis Hanatu, wo si hänn fiir Stunde gschunde

Je suis Solomi, wo wird verkauft fir weenig Gäld

Je suis Araba, wo Sglaavin wird uff eme Fäld

Je suis Jummaj, wo sich in Paanigg suizidiert

Je suis Eli, wo sich fiir sich au no geniert

Je suis Febi, wo nimm weiss wo Heimat isch

Je suis Pindar, wo silbe mool scho gestoorbe-n-isch

Je suis Kuthe, wo noo dr Mamma schreyt

Je suis Mül, wo ins Boordleese gheyt

Je suis Püt, wo Leth nur von Mähli komet

Good luck, Jonathan!

D Ladäärne-Uusstellig uff em Minschterplatz und
 d Waage- und Reggwisyte-Uusstellig bi dr Kasäärne
 sin vom Määntig znacht bis am Mittwoch demoorge!